

АКАФИСТ СВЯТИТЕЛЮ МИТРОФАНУ, ЕПИСКОПУ ВОРОНЕЖСКОМУ

Кондак 1

Избранный чудотворче и изрядный угодниче Христов, многоцелебный источник и молитвенниче о душах наших, святителю отче Митрофане, яко имея дерзновение ко Господу, от всяких нас бед свободи зовущих: Радуйся, Митрофане, великий и преславный чудотворче.

Икос 1

Ангел земный и человек небесный был еси, святителю отче Митрофане: вперив бо ум в Божественная, временная и земная пренебрегл еси, темже и вселился в тя Пресвятыи Дух, Егоже благодатию светло украшен еси. Сего ради тебе, на Небеси и на земли прославленному, вопием сице: Радуйся, яко чистотою и святынею Ангелом уподобился еси; радуйся, яко постом и бдением безстрастия достигл еси. Радуйся, светильниче Божественнаго света; радуйся, молитв благовонное кадило. Радуйся, верных непреложное утверждение; радуйся, неверных богомудренное обличение. Радуйся, христиан непостыдное прибежище; радуйся, благочестия стено неборимая. Радуйся, крепкое кормило Церкви Христовы; радуйся, непоколебимый столпе Православия. Радуйся, апостольских преданий верный хранителю; радуйся, таин Божиих истинный строителю. Радуйся, Митрофане, великий и преславный чудотворче.

Кондак 2

Видяще от святых мощей твоих приснотекущий источник исцелений, благоговения и радости исполнени, благодарим Бога, дивно прославляющаго святыя Своя, вопиюще Ему: Аллилуиа.

Икос 2

Разумом, просвещенным свыше, вразумляя заблуждших, поборник был еси истинныя Христовы Церкви, егда в царствующем граде Москве суемудреннии лжеучителие на соборе святительском отверзоша нечестивая уста своя на ея хуление. Мы же от мысленных волков избавльшеся, верно взываем ти: Радуйся, цевнице Духа Святаго, бряцающая славу Божию во спасение человеком; радуйся, гrome, сокрушая еретическое злочестие. Радуйся, молнии, попадающая плевелы неверия; радуйся, ясное зеркало апостольских преданий. Радуйся, немолчный благовестниче велений Христовых; радуйся, верный наставниче богомудрия. Радуйся, монашествующих славо; радуйся, архиереев божественное удобрение. Радуйся, златозарное светило, просвещающее землю Русскую; радуйся, надежный ходатаю нам Царствия Небеснаго. Радуйся, яко твоим к Богу молени-

ем от ада свободяемся; радуйся, яко твоим предстательством райския жизни сподобляемся. Радуйся, Митрофане, великий и преславный чудотворче.

Кондак 3

Силе Вышняго чудодействующей, никтоже притекай к тебе, преблаженне отче, отходит тощ: недугующим бо явился еси исцеление, слепым прозрение, хромым утверждение, и вси благовернии людие, скорого тя помощника стяжавше, радостно Богу воспевают: Аллилуиа.

Икос 3

Имеяй в сердце своем огонь любви Божественныя, спасения ради душ человеческих пастырски подвизался еси, богомудре, противу козней диавольских и победительным оружием креста разсекал еси сети лукаваго, яко паучину. Темже прими от нас песнь сию: Радуйся, рабе Божий, благий и верный; радуйся, достойный делателю вертограда Христова. Радуйся, учителю смирения и целомудрия; радуйся, образе кротости и послушания. Радуйся, мужу желаний; радуйся, Проповедниче чудес Божиих. Радуйся, наставниче дел добрых; радуйся, твердое ограждение Христовы Церкви. Радуйся, огневидный столпе, наставляяй на путь спасения; радуйся, светозарный светильниче, верная просвещаяй. Радуйся, неизчерпаемый сосуде благодати Христовы; радуйся, чистое приютлище Духа Святаго. Радуйся, Митрофане, великий и преславный чудотворче.

Кондак 4

Бурю мирскаго жития и тяжелоносныя страстей волны прешед, обрел еси тихое пристанище и, в пустыню вселився, неленостно работал еси Христу во мнозе долготерпении. Отнюдуже руководил еси в Царствие Божие и духовная чада своя, научив их едиными усты и единым сердцем пети Богу: Аллилуиа.

Икос 4

Слышаще дивныя о Бозе труды твоя, святителю отче Митрофане, прихождаху к тебе издалеча жаждущии глаголов живота вечнаго: понеже ты учил и творил еси, наставлял словом и житием своим. Сего ради любовью вопием ти: Радуйся, апостолов преемниче; радуйся, святителей сопредстольниче. Радуйся, преподобных собеседниче; радуйся, праведных украшение. Радуйся, венче воздержания; радуйся, благосеннолиственное древо, потоками райскими воспитанное. Радуйся, беспомощных спасительное призрение; радуйся, цвете нетления. Радуйся, яко отчуждением временных благ стяжал еси блаженство нищеты духовныя; радуйся, яко самовольным обнищанием обрел еси сокровище благ вечных. Радуйся, яко во глубину смирения приникл еси; радуйся, яко на высоту бесстрастия возшел еси. Радуйся, Митрофане, великий и преславный чудотворче.

Кондак 5

Боготечней звезде, путеводившей древле волхвов к праведному Солнцу, подобен был еси, всехвальне отче, сам восходя благодатию Божию от силы в силу, и приводя с собою ко Христу Богу всех ищущих спасения. Темже и мы, немерцающим сиянием славы твоя озаряеми, согласно вопием Ему: Аллилуиа.

Икос 5

Видевше в тебе воронезстии людие перваго архипастыря, яко Ангела, знамение небесных благодати носяща, возрадовашася радостию неизглаголанною: ты же, добре внимая себе и всему стаду, в немже ты Дух Святыи постави епископа, пасл еси усердно Церковь Господа и Бога, яко слово воздати хотя. Сего ради ублажаем тя, отче Митрофане, зовуще: Радуйся, человеце Божий, преподобием, аки поясом златым, препоясанный; радуйся, друже Христов, святительством, аки бисером драгим, преукрашенный. Радуйся, воине Христов непобедимый; радуйся, страже дома Божия неусыпный. Радуйся, восхождения в сердце своем к Небеси положивый; радуйся, словесных овцы Христовы на живоносных пажитях воспитавый. Радуйся, яко не попустил еси душетленному зверю расхитити стадо твое; радуйся, яко от Небеснаго Пастыреначальника праведное воздаяние приял еси. Радуйся, возлюбивый благолепие дому Божия; радуйся, в самом себе храм Триипостасному Божеству уготовавый. Радуйся, яко во умерщвленном телеси ризою нетления одеян еси; радуйся, яко из гроба зарею бессмертия нас осияваеши. Радуйся, Митрофане, великий и преславный чудотворче.

Кондак 6

Словес евангельских, еже не скривати себе сокровища на земли, верный блюститель показался еси, всеблаженне Митрофане, егда достояние свое мудре расточил еси, снабдевая убогих и пособствуя благоверному императору Петру в сооружении кораблей на побеждение неверных агарян, не ведущих пети: Аллилуиа.

Икос 6

Возсия царству православному благотворный свет великих добродетелей твоих, святителю отче Митрофане, о нихже благо-даряще Отца Небеснаго, к тебе яко к присному о нас молитвеннику, взываем сице: Радуйся, наставниче целомудрия; радуйся, смирения Христова истинный подражателю. Радуйся, олтаря Господня благоговейный служителю; радуйся, святителей украшение. Радуйся, иноческаго равноангельнаго жития ревнителю; радуйся, безмолвия древних богоносных отец подражателю. Радуйся, милости струе неизсякаемая; радуйся, благоутробия хранилище неоскудное. Радуйся, сирых благонадежное пристанище; радуйся, вдовиц скорое заступление. Радуйся, множество душ уневести-вый Христу; радуйся, купно с ними пребываяй в радости Господа твоего. Радуйся, Митрофане, великий и преславный чудотворче.

Кондак 7

Хотящу некогда благоверному императору Петру беседовати с тобою, призван был еси во двор царский: егда же внезапно узрел окрест его изваяния языческа, абие возвратился еси вспять, не убоясь прещения царева, и готов был еси душу свою положить паче, неже растлити мысленныя очи сердца своего неподобным видением, научая верных единому живому Богу пети: Аллилуиа.

Икос 7

Новаго тя по благочестии ревнителя познав благоверный царь и видя небоязненное твое на смерть изволение, повеле суетная изваяния низринути. Мы же святому дерзновению твоему чудящися, вопием: Радуйся, непреклонный исповедниче Православия; радуйся, ревностный защитниче благочестия. Радуйся, священнотаинниче благодати; радуйся, велегласный проповедниче покаяния. Радуйся, апостолов немолчная уста; радуйся, Церкви непоколебимый столпе. Радуйся, пастырю добрый; радуйся, яко непричастен явился еси лицепрятию. Радуйся, яко истину не обвинуяся свидетельствовал еси; радуйся, яко твоим посьбием сокрушаются козни вражия. Радуйся, яко всем верным воспоминание твое пресладко; радуйся, яко всей Церкви Христовой имя твое пречестно. Радуйся, Митрофане, великий и преславный чудотворче.

Кондак 8

Странное и преславное чудо благодати небесныя является ныне во очию всех верных: долготерпеливый и многомилостивый Господь не прогневался на ны до конца за беззакония наша, но, помянув щедроты Своя, дарова нам тебе, досточудне отче, заступника изрядна, тако вознесе рог спасения нашего, да выину поем Ему: Аллилуиа.

Икос 8

Весь еси в вышних, но и нижних не оставляеши, святителю отче Митрофане, присно со Христом царствуеши, и о нас грешных молитвы к Нему возсылаеши: не точию бо припадающих к цельбоносным мощам твоим, но и далече отстоящих, призывающих же всечестное имя твое, предстательством твоим соблюдаеши от всякаго зла. Темже во умилении зовем ти: Радуйся, прибежище наше во всех скорбех; радуйся, скорый помощниче всех в бедах сущих. Радуйся, целителю болезней душевных вкупе и телесных; радуйся, на невидимые враги наша сильный поборниче. Радуйся, посетителю в немощи лежащих; радуйся, утешителю в бедах сущих. Радуйся, яко тобою престаает рыдание; радуйся, яко тобою подается радость. Радуйся, яко Христу доблественно последовал еси; радуйся, яко Сладчайшему Иисусу до конца послужил еси. Радуйся, яко наслаждаеши лицезрения Божия; радуйся, яко сподобился еси зрети не вечерний день Царствия Его. Радуйся, Митрофане, великий и преславный чудотворче.

Кондак 9

Всякия скорби и труды доблественно претерпел еси, шествуя по пути спасения до маститыя старости, облечен во всеоружие Божие, во плоти аки безплотен, умерщвляя страсти и сокрушая наветы миродержителя тьмы века сего. Темже Небесным сопричислен силам, купно с ними воспеваваеши Богу: Аллилуиа.

Икос 9

Ветии многовещаннии недоумеют изобразити обилия любве твоея, еюже, отходя к Творцу, преисполнен был еси к чадам твоим о Господе: восхотев бо и по отшествии своем присно поучати их, яко живый, завещал еси им вся потребная ко спасению. Сего ради из глубины сердец вопием ти: Радуйся, благочестно течение скончавый; радуйся, веру соблюдый всецелу. Радуйся, оружием благоволения Божия венчанный на земли; радуйся, венцем нетления украшенный на Небеси. Радуйся, долу величием чудес блистающий; радуйся, горе лучами Трисолнечнаго Света осияваемый. Радуйся, яко в пресветлых райских обителях вселяешися. Радуйся, яко лицом к лицу Божественнаго света причащаешися. Радуйся, яко с небесных высот на мольбы наша призираеши; радуйся, яко в сонях и видениях во благо нам являешися. Радуйся, яко молитвами твоими от вечныя смерти свободяешися; радуйся, яко предстательством твоим безконечныя жизни сподобляешися. Радуйся, Митрофане, великий и преславный чудотворче.

Кондак 10

Иже всем человеком хотяй спастися и в разум истины приити, Господь и Бог наш Иисус Христос явил нам нетленное тело твое на земли, яко живоносную купель, врачующую всяку болезнь и всяку язю в людех. Темже благодарственно вопием Ему: Аллилуиа.

Икос 10

Стена еси спасения прибегающим к тебе, святителю Митрофане, и в бываемых от тебе знамениях, исповедающих величие Божие. Сего ради, ущедрени твоим чудодейственным о нас ко Христу Богу ходатайством, вопием ти: Радуйся, царей благочестивых поборниче; радуйся, архиереев православных укрепление. Радуйся, царства право-славнаго защитниче; радуйся. Церкви святей утверждение. Радуйся, прежде смерти умертвивый плоть свою; радуйся, предкусивый жизнь вечную, прежде внития в селения райская. Радуйся, умерый миру прежде кончины твоея; радуйся, воскресый духом во Христе, прежде успения твоего. Радуйся, яко от обители земныя во Обитель Небесную преселился еси; радуйся, яко от Обители Небесныя во обители земныя благодворя нисходиши. Радуйся, яко и по отшествии твоём с нами пребываеши. Радуйся, яко и по умертвии твоём умерщвленныя грехми души молитвами твоими оживляеши. Радуйся, Митрофане, великий и преславный чудотворче.

Кондак 11

Пение, приносимое ныне, аще бы и превыше человеческого было, не довело бы к Славословию Бога, даровавшего тебе благодать исцелений. Сего ради недоумеюще благохвалити его по достоянию, смиренномудренно вопием: Аллилуиа.

Икос 11

Светоподательна светильника, просвещающего души наша верою, видим тебе, преблаженне отче, пред Престолом Божиим стояща, и твоим блистанием озаряеми, зовем ти таковая: Радуйся, пастырю предивный; радуйся, учителю премудрый. Радуйся, столпе веры непоколебимый; радуйся, насадителю благих. Радуйся, чистоты селение; радуйся, печальных утешение. Радуйся, сирых питателю; радуйся, обидимых предстателю. Радуйся, премудрости Божия приятелище; радуйся, источниче неизчерпаемая благодати исцелений. Радуйся, провозвестниче Божественных велений; радуйся, сокровище милосердия Божия неистощимое. Радуйся, Митрофане, великий и преславный чудотворче.

Кондак 12

Благодать, свыше ти данную познавше, благоговейно лобызаем святолепное изображение всечестнаго лица твоего, еже благоволил еси дивно явити нам. Темже благодарственно вопием Христу Богу нашему: Аллилуиа.

Икос 12

Поюще твое к Богу отшествие, святителю Митрофане, почитаем священную память твою, величаем ревность по Бозе, хвалим долготерпение, славим незлобие, и ублажаем кончину твою: на смертнем бо одре возлежа, желанием возжелал облещися в великий ангельский образ, наречен был Макарием, блаженства тезоименитым, блажен быв воистинну, яко Царствие Небесное наследовал еси. Темже молящися усердно, о еже сподобитися и нам неосужденно предстати на Страшное судище Христово, взываем ти: Радуйся, у Престола Божия теплый о нас предстателю; радуйся, мужу желаний, прославивший Бога в телеси и в души своей. Радуйся, добropобедный воине Царя Небеснаго; радуйся, вождю премудрый ратующим противу сил адовых. Радуйся, яко с горящим светильником сретил еси Христа; радуйся, яко от Него благодать исцелений приял еси. Радуйся, яко благоволением Пресвятыя Богородицы возвеличен еси; радуйся, яко во светлостех святых пребываеши. Радуйся, яко со пророки и апостолы ликовствуеши; радуйся, яко со святители и мученики прославлен еси. Радуйся, яко с преподобными и праведными веселишися; радуйся, яко со всеми избранными Божиими присно торжествуеши. Радуйся, Митрофане, великий и преславный чудотворче.

Кондак 13

О великий и пречудный отче Митрофане, приими благоутробно сие малое моление наше, и твоим благоприятным ходатайством избави нас от всех враг видимых и невидимых, от всякия напасти и скорби, от напрасныя смерти и будущия муки, да сподобимся с тобою и со всеми святыми во веки воспевати Богу Спасителю нашему: Аллилуиа.

(Этот кондак читается трижды, затем икос 1 и кондак 1)